

# Siona

---

Iahova Misil Provet Siona Tengan Vasel Xat Mol-Nineva Xil,<sup>a</sup> e Siona  
Ien ti Tavei  
*Siona 1:1-17*

**1** <sup>1</sup>E tan tahal Isrel, provet tei da en, hisen Siona, nat Amitai. Vatei, Iahova misepin mi bit, <sup>2</sup>“Utemanon uhe taon xa mahulong tahal Nineva, e usel xat moletin xil xa ladi en. Uhiteni mi xil xa sexien nae xil pupuru pupu pe metok.”

<sup>3</sup>E Siona, ien ti tavei vahusil suse xa be ist tangan ha vasa sepinien na Iahova mi xil. Mak, ma xi biles be wes e suse sav tangan valesae rani. Ba duxoh pasis te taon tahal Sopa, e rute ak, xi mikamet tuturil tei xa di labue xat xi tangan vahe Spen, kantri tei xa be sotin pilei mak e rin xa wes. Ma xi minggal suse nan, e be tuturil ak del boskru xil nen. Di, tuturil ak miloh tangan vahe Spen del Siona xa di milesae ra Iahova.

<sup>4</sup>Melele xa tuturil ak di miloh ba, Iahova pol ni vatiang mu e tas misa xa misa. Sangas tuturil ak vamahoe lel. <sup>5</sup>Boskru xil ulixil mikan pupu, e xil kekes di ladak kes hi nae xil tangan lasa tutouen mi xil. Di, laleh rat holesok xil xa ladi vangit tuturil e laso ni be tas tangan vapol ni tuturil ak vameit mu.

E Siona, xi ba be vangit tuturil ak, ba pat e por sae. <sup>6</sup>Melele xa vatihos be vangit tuturil ak, mikamet Siona ma biteni mini bit, “!Ei! ?Veneh ma di opat mak? Tamea, e usis mi hi nam ve tutouen. Xos xi iaxa mikila en isae e xir e iteh meulien e xir.”

<sup>7</sup>Di, boskru xil lamei vituei e laling nenemien nae tangan lilihi hise xil tangan lakameti xa visi e xil di milihi an tesa ak ba xat xil. E melele xa lapol ni, lalihi his Siona. <sup>8</sup>Ma ba lasepin mini labit, “?Ei, uhiteni mi xamem, veneh ma an tesa ak di bas xir? ?Polien eah iaxa xouk di opol ni? ?Xouk onngo kantri xave e moletin nam xil labe hisit moletin eah?”

<sup>9</sup>Ma Siona biteni mi xil bitene, “Inou nabe man Isrel tei e di namot mi Iahova, Hi te ut nesao xa tepol ni tan e tas.” <sup>10</sup>Di, Siona bit rat xi mi xil bit xi di milosae rani.

---

<sup>a</sup> 1:1 Nineva be taon tei na mol-Asiria xil xa labe elu ni mol-Isrel xil.

Melele xa boskru xil lalonge mak, ulixil mikan pupu ma lasel mini labit, “?Veneh ma xouk otepol tesa pupu temak?” <sup>11</sup>E melele xa lapusi xa vatiang di bemei nggeih pilei mu, lasis Siona labit, “?Uhiteni mi xamem, mupol ni itep minuk tangan isak ni an tesa ak ihe tan?”

<sup>12</sup>Ma Siona bit rilomun ni mi xil bitene, “Mupo nou e muso nou nihe tas. Melele xa mupol ni imak, ma tas mei ihos rilomun. Nakila xa vatiang ak bas xir mak venou.”

<sup>13</sup>E boskru xil iexil ti tavei tangan laso Siona vahe tas. Misak ni xil lasak tangan lavalis ni tuturil ak vahe ut, e lasakras vengon xa tehe xil mei labe tellep mu e vatiang mei nggeih pilei sung. <sup>14</sup>Ma di, xil ladak kes Iahova labit, “O Iahova, masis minuk li xa onasa longpangasien ti mi xamem ve maten na moletin xai. Reitin, onahas xamem ti li vengon xa xouk, Iahova, otepol ni holesok xil ak testal texo hem e tehusil lingxatien nam kestang.” <sup>15</sup>Di, lapo rat Siona e laso ni be tas. E vatakes, tas mei bos rilomun. <sup>16</sup>Melele xa boskru xil lapusi mak, lamerere ni Iahova himetu. Ma lasa sanien eo tei te memesien mini e xil kekes lapol ni hitxatien nae xil dela.

<sup>17</sup>E e rin na Siona, Iahova misil meseo tei xa mahulong mei miromi. E Siona tamat ti, xi meul tang de vang meseo ak melengien tol.

### E Vang Meseo, Siona Di Misis mi Iahova

#### *Siona 2:1-10*

- 2** <sup>1</sup>Melele xa Siona de vang meseo ak, xi misis mi Iahova, Hi nan, bit,  
<sup>2</sup> “O Iahova, natelong pangas nou pupu ma natekei tehat minuk li,  
 e xouk oteteong ni nou e otetutou ni nou.  
 Melele xa natenemi natehit di nabe von maten, natetak kesuk,  
 e xouk oteteong ni nou li.
- <sup>3</sup>Xouk oteso nou natehe mesavuol  
 e natemarir natehe huinep te tas.  
 E inggak, tas teta xol nou  
 e tehe xil mun latekilkiles ni nou.
- <sup>4</sup>Natenemi natehit otesil rat nou natehe relinguk.  
 E ieok tehei tangan nipus ti mun Nim Eo nam.
- <sup>5</sup>Tas texa xol nou,  
 natemarir natehe tan  
 e lulum te tas tevar xat vatuk.
- <sup>6</sup>Natehe tan teha vuma ... natetuxoh vatit hu xil xa ladi pe tas.  
 Natelonge lehit ngan xa latevar xat nou e von maten e nateta tuok.  
 E xouk Iahova, Hi navan, otemei sung  
 otehur rat nou rilomun ra pe tas ak tangan nameul.
- <sup>7</sup>O Iahova, melele xa natelonge sangas xa meulien navan ha vavus,

natenem rilomun ni xouk.

Natesis tehat minuk,

e otelong nou e Nim Eo nam.

<sup>8</sup> Ngan xil xa di lamot mi nanao votei xil,

xil di lastokovein xouk xa obe vatit hosien nae.

<sup>9</sup> E inou, ti nikikei minuk itel memesien,

e nisa sanien eo tei ihat minuk.

Naha xa natehit xati minuk tangan nipol ni, nipol sen ni.

O Iahova, xouk kestang di oteh meulien e moletin.”

<sup>10</sup> Di, e melele xa Siona misis bus, Iahova misemae ni meseo ak, ma ba, miluh rat Siona ba be suvien.

### Siona Milong Xat Iahova e Ba Be Nineva

#### *Siona 3:1-10*

**3** <sup>1</sup> Iahova misepin vatei mun mi Siona bit, <sup>2</sup> “Uhe taon xa muhulong tahal Nineva, e uhit mesen sepinien xa nisa ni minuk mi xil.”

<sup>3</sup> Ma Siona milong xat Iahova e ba be Nineva. Taon tahal Nineva be mahulong pupu. Xosxa moletin de rin tei e minemi bit vahe rin sav, xi ikakao melengien ihe tol vari. <sup>4</sup> Ma Siona ba be taon ak e mikakao en melengien tei. Di, melele xa de hilaep xati te taon ak, xi miki ba ni moletin xil bitene, “Melengien be hanutap lu (40) sutang di tangan Hi ihu len vari ni taon ak tahal Nineva.”

<sup>5</sup> Melele xa moletin xil tahal Nineva lalonge mak, laneket e sepinien na Iahova. Ma labithiteni tangan moletin xil vus, ngan xil xa latellep ha ituxoh ngan xil xa latereli, lihal ni anien e lising ni talmusu xil tangan lipisen ni xa lalonge misa ve tesaen xil nae.

<sup>6</sup> Melele xa suv toto tahal Nineva milongeong ni usil naha xa Siona di tehithiteni, milonge misa pupu. Ma mitamea ra hor nan e mileh rat eising hos xil nan. Di, mising ni talmusu xil tang e ba midotan de husupang xil.

<sup>7</sup> Di, misemae ni tangan latis mesen rae nan ak iha mi mol-Nineva xil vus tangan ti lihusili xa bit:

Ngan ak be rae na suv toto del eilep nan xil. Moletin xil vus itel vongoro sae xil mun linakar pis ti anien e linamu ti oei. <sup>8</sup> Moletin xil vus itel vongoro sae xil mun lising ni talmusu xil e ti litak kes Hi ve esaen nan. Xil lihiles ra tutuen nae xil e sexien tesa nae xil mun.

<sup>9</sup> Melele xa ripol ni imak, ma xos Hi nasa ti mun pangasien namei xat xir. Xos xi ikila ihiles nenemien nan e nahu vin xir ti natel ekaten nan xa nggeih pupu.”

<sup>10</sup> Melele xa Hi miketeh pus naha xa latepol ni, e pusi xa latehiles ra sexien tesa xil nae, xi biles nenemien nan e tasa pangasien ti mun mi xil vaxoni ngan xa tehiteni.

**Siona Ien Mikat Iahova Vengan xa Xi Pisen Esaean mi Elu Nan Xil**  
*Siona 4:1-11*

**4** <sup>1</sup>Melele xa Siona pusi xa Iahova en misae e mol-Nineva xil, xi milonge misa e ien mikat pupu. <sup>2</sup>Ma xi misis mi Iahova bit, “O Iahova, melele xa nada tamu e tim savan, nakila ngamu xa xouk upol ni imak. Mak vari iaxa natelesae natehe Spen. Natekila xa xouk obe hisit Hi tei xa di opisen eheien e esaean mi moletin xil. Xouk di onggur xat ekaten nam e di opisen hosien nam mi moletin xil. Vehakut di obiles nenemien nam tangan onasa pangasien ti mi moletin xil. <sup>3</sup>!O Iahova, taxeak, uhur rat meulien navan! !Vahit namat vahos mak mu vali ngan nameul nada xiak!”

<sup>4</sup>E Iahova bit rilomun ni mini bit, “?Onemi obit momal tang tangan ti iem vakat vamak?” E Siona tavit rilomun ni ti sepinien mini.

<sup>5</sup>Di, Siona be reling taon ak e ba dotan e rute tei xa be ist xa mikila vapus taon tahal Nineva. E inggak, xi pet horao tei e dotan de paen vengon xa bit vapus ti mu naha vaxul mi taon ak.

<sup>6</sup>Di, Iahova misak ni uval tei meul katen usil horao xa Siona tepeti tangan vahe memal man e vapol ni xi nalonge ti mun nasa. Ma melele xa Siona pusi, xi besi xi ven. <sup>7</sup>E visuvong nen, melele xa ut milan, Hi misa vueang tei mei mingas uval ak, ma uval ak mat. <sup>8</sup>E melele xa eai bemei nesao, Hi misa vatiang tei nggo ist xa mitin. Eai minggasil e vat Siona ma ven memel. Ma xi ien bei maten e biteni bit, “!Vahit namat vahos mak mu vali ngan nameul nada xiak!”

<sup>9</sup>E Hi biteni mini bit, “?Onemi obit momal tang tangan ti iem vakat vamak ve uval ak?”

E Siona bit, “!Io! Momal tang tangan nalonge vamak. !Ieok mikat pupu ve rin ak! !E vahit namat, vahos mak mu!”

<sup>10</sup>Ma Iahova biteni mini bit, “Uval ak meul bemei nesao e vongien tei tang, e mat e vongien sav. Xouk otapol ni ti neta ven, e tave xouk ti iaxa opol ni vameul. Tave ti neta xa mak, e xouk iem misae pupu ve maten nan. <sup>11</sup>?Ma midep? ??Tamal ti tangan inou nipisen esaean navan mi moletin xil tahal Nineva?? !Ngan xil xa di lameul e taon ak lali taosen be handred tei e hanutap tei mun (120,000) e latakil ti vari neta xa bos e neta xa misa!<sup>b</sup> E vongoro xil mun xa ladi en labe holu pupu. Siona, momal tevi tangan ieok vasae e meulien na moletin xil ak.”

---

<sup>b</sup> 4:11 Latakil ti xa ngan ak be moletin xil vus tahal Nineva mu tuten nae xil tang.